

М.Ш. Аҳмедова,
катта ўқитувчи,
ТДИУ

ҚИШЛОҚ ХЎЖАЛИГИ МАҲСУЛОТЛАРИ ЕТИШТИРИШНИ ҚЎЛЛАБ-ҚУВВАТЛАШ ИҚТИСОДИЙ ТАҲЛИЛИ

Мамлакатимизда амалга оширилаётган ислохотлар жараёнида қишлоқ аҳолисининг турмуш даражасини юксалтиришга, қишлоқларимиз қиёфасини ўзгартиришга, жаҳон андозаларига мос келувчи замонавий архитектура ва дизайн асосида барпо этиладиган, барча қулайликлар ва коммуникация тизимларига эга бўлган шинам уй-жойлар барпо этишга, ижтимоий соҳа ва ишлаб чиқариш инфратузилмасини ривожлантиришга алоҳида эътибор қаратилмоқда.

Маълумотларга кўра, Ўзбекистон Республикаси аҳолисининг 18,3 млн. нафари ёки 70,4 фоиз қисми қишлоқда, 7,7 млн. нафари ёки 29,6 фоиз қисми шаҳарда истиқомат қилади. Шундай экан, қишлоқда яшаётган аҳоли учун муносиб турмуш шароитларини яратиш миллионлаб ватандошларимизнинг фаровонлигини юксалтиришга, уларда эртанги кунга бўлган ишонч ва ҳаётдан қониқиш ҳисларини шакллантиришга хизмат қилади.

Қишлоқда уй-жой қуриш ва ижтимоий инфратузилмани ривожлантиришни жадаллаштириш дастурининг 2010 йилнинг муҳим устувор йўналишлари қаторига киритилишига тўлиқ асос бор. Юртимизда 2009 йилнинг “Қишлоқ тараққиёти ва фаровонлиги йили” деб эълон қилиниши, шу муносабат билан қабул қилинган Давлат дастурининг амалга оширилиши қишлоқларимиз қиёфасини замонавий архитектура ва саноат асосида тубдан ўзгартириш ва янгилаш, уй-жой, ижтимоий ва коммунал объектлар, коммунакацияларни барпо этиш бўйича узоқ муддатга мўлжалланган аниқ мақсадли ишларимизнинг бошланиши бўлди. Буларнинг барчаси қишлоқ аҳолиси турмуш даражасини тубдан ошириш ва шаҳар шароитига яқинлаштиришга хизмат қилади.

Фермер хўжаликларининг ишлаб чиқариш – молиявий фаолиятларини ҳар томонлама ўрганиб чиқиш жараёнида қўлланиладиган асосий вазифалар қуйидагилардир: таққослаш, статистик гуруҳлаш, ўртача ва нисбий кўрсаткичлар, занжирли боғлаш усуллари, математик усулларни қўллаш ва бошқ. Қишлоқ хўжалиги фаолиятини юқорида қайд этилган усуллар ёрдамида ўрганиш хўжаликлардаги фойдаланилмаётган имкониятларни аниқлаш, уларни ишлаб чиқариш, жорий этиш, иш фаолияти самарадорлигини ошириш имконини яратади. Бундан энг кўп қўлланиладиган усуллардан бири таққослашдир. Бу усулда қуйидаги иқтисодий кўрсаткичлардан фойдаланилади:

- ҳисобот кўрсаткичлари режада келтирилган маълумотлар билан таққосланади;

- ҳисобот йилида эришилган натижалар кўрсаткичи бу борадаги ижронинг ўтган йилги маълумотлари билан солиштирилади;

- ишлаб чиқариш йўналишида бир неча йил давомида ўзгаришлар динамикаси аниқланади.

Хусусан, ҳар гектар қишлоқ хўжалиги ери ҳисобига қанчадан даромад олиш, ҳар 100 га ер ҳисобига чорва маҳсулотлари етиштириш, меҳнат унумдорлигини, маҳсулот таннархини, маҳсулот сотиш, қишлоқ хўжалигида товар маҳсулотлари ҳажми ўсишини, хўжаликларнинг даромадлари ва уларнинг тақсимланиши, техникадан фойдаланиш, меҳнат, ем - хашак балансини, хўжалик иқтисодиётининг ривожланиши ва бошқа кўрсаткичларни таққослаш мумкин.

Чорвачилик Ўзбекистон иқтисодиётида муҳим ўрин тутди. Мамлакат қишлоқ хўжалиги ялпи маҳсулотининг 40 фоизидан ортиғи унинг ҳиссасига тўғри келади. Республикада қорамоллар сони охириги 5 йилда 2,6 млн. бошга ёки 145 % камайиб, 8,5 млн. бошга етди. Шу жумладан, шахсий ёрдамчи ва деҳқон хўжаликларида 2,2 млн. бошга, фермер хўжаликларида 200 минг бошга ошди. Шу йиллар давомида пуллик хизмат кўрсатиш даражаси 6 баробарга ошди. Аҳоли қарамоғидаги чорва молларини кўпайтириш ва аҳоли бандлигини ошириш мақсадида қорамоллар сотиб олиш учун охириги 4 йилда 125.6 млрд. сўм миқдорида микрокредитлар ажратилди. Паррандачилик фермер хўжаликлари сони охириги уч йилда 370 тага ошиб, 677 тага етказилди. Ушбу мақсадларда биргина 2009 йилнинг ўзида 18 млрд. сўм миқдорида кредит маблағлари ажратилди.

Тошкент вилоятида чорвачилик бўйича 2010 йилнинг 1 январь ҳолатига ўтган йилнинг шу даврига нисбатан йирик шохли қорамоллар - 9,1 %га, жами 589508 бошни ташкил этди, шу жумладан сигирлар – 9,7 %га 267097 бош, қўй ва эчкилар – 7,0 %га 613286 бош, паррандалар - 12.9 % 8769,7 бош кўпайди. 2009 йилнинг январь-декабрида барча тоифадаги хўжаликларда 156585,0 тонна тирик вазнда гўшт 2008 йилга нисбатан 7,4 %га кўп, 531638 тонна сут 6,8 % кўп, 743123,8 минг дона тухум 13,5 % кўп, 1465,5 тонна жун 7,9 % кўп, 1513,5 тонна пилла 0,5 % кўп етиштирилди.

Барча ҳудудларда чорвачилик маҳсулотлари - гўшт, сут, тухум ишлаб чиқаришнинг ўсиши, асосан, деҳқон ва фермер хўжаликлари ҳисобига бўлиб, гўшт ишлаб чиқариш умумий ҳажмида уларнинг улуши 94,8 %ни, сут ишлаб чиқаришда 98,0 %ни, тухум ишлаб чиқаришда 43,9 %ни ташкил этди.

Сўнгги йилларда Республика фермер хўжаликларида қишлоқ хўжалиги маҳсулотларини етиштиришни қўллаб-қувватлаш ва рағбатлантириш борасида ҳукумат томонидан амалга оширилаётган изчил тадбирлар, хизмат соҳасида алоҳида тармоқларни ривожлантириш бўйича қабул қилинаётган қатор дастурий йўналишлар хизмат кўрсатиш ва сервис соҳаси, шунингдек, маиший хизмат кўрсатиш соҳасини юқори суръатлар билан ривожлантиришга олиб келмоқда

Ўзбекистон Республикаси Президенти И.Каримовнинг 2006 йил 17 майдаги “Хизмат кўрсатиш ва сервис соҳасини 2006-2010 йилларда ривожлантириш ҳақида”ги ПК 325-сонли ва 2007 йил 21 майдаги “Ўзбекистон Республикасида 2010 йилга қадар хизмат кўрсатиш ва сервис соҳасини

ривожлантиришни жадаллаштириш бўйича кўшимча чора-тадбирлар ҳақида”ги ПК 640-сонли қарорлари бунга яққол мисол бўла олади. Хусусан, республикамизда 2010 йилга қадар хизматлар ва сервис соҳасини ривожлантиришни жадаллаштиришга оид кўшимча чора - тадбирлар ҳақидаги қарорда қуйидаги асосий йўналишлар белгилаб берилган:

- хизматлар кўрсатиш соҳасида тадбиркорлик фаолиятини янада кучайтириш учун қулай шарт-шароит яратиш;

- 2010 йилгача хизматлар ҳажмининг ялпи ички маҳсулотдаги улушини 49 фоизга етказиш;

- қишлоқ жойларида истиқомат қилаётган аҳолига кўрсатилаётган хизмат турларини кўпайтириб бориш;

- анъанавий хизмат турлари билан биргаликда янги истиқболли – юридик, консалтинг, банк, молия, суғурта, лизинг ва баҳолаш хизмат турларини жадал ривожлантириш;

- мамлакатимиз корхоналарининг халқаро бозордаги хизматлари даражасини ва сифатини ошириш ҳамда шу асосда хизматлар экспортини кўпайтириш;

- хизмат ва сервис соҳасида ишлайдиган кадрларни тайёрлаш ва улар малакасини оширишни ҳар томонлама қўллаб-қувватлаш.

Хизматларнинг замонавий илғор турлари – телекоммуникация хизматлари, уяли телефон алоқаси, банк - молия хизматлари, лизинг таркибидаги кредитлар ажратиш, суғурта, сайёҳлик – экскурсия ва замонавий хизмат кўрсатиш турлари жадал суръатда ривожланмоқда. 2008 йилда хизмат кўрсатиш соҳасида 215 мингдан кўп янги иш ўринлари 2103 та савдо ва 5138 та маиший хизмат кўрсатиш шахобчалари ташкил этилди.

Ўудудлар ёнма-ён бир хил шароитда жойлашганликларига қарамай, уларда кўрсатилаётган хизматлар бир-биридан фарқ қилади. Агар Тошкент шаҳрида ҳар бир кишига 2762,3 минг сўмлик, Навоий вилоятида 963,1 минг сўмлик, Тошкент вилоятида 848,8 минг сўмлик хизматлар кўрсатилган бўлса, бу кўрсаткич Қорақалпоғистон Республикасида – 204,5 минг сўмни, Сурхондарё вилоятида – 290,1 минг сўмни, Жиззах вилоятида 312,2 минг сўмни ташкил этди.

Қарорларда белгиланган вазифаларнинг амалга оширилиши натижасида 2008 йилда аҳолига кўрсатилган умумий хизмат ҳажми 121,3 % ўсиб, 2,7 млрд. сўмни ташкил этди.

ЯХМ ишлаб чиқариш умумий ҳажмининг 51,4 %и кичик тадбиркорлик ҳиссасига тўғри келди ва бу кўрсаткич 2008 йил январь-декабрга нисбатан мос равишда 1,8 % кўп. Кичик корхона ва микрофирмалар томонидан ЯХМнинг 31,0 фоизи ишлаб чиқарилиб, 2008 йил январь-декабрга нисбатан 0,3 % кўп бўлди.

Республикамизда 2008 йил якуни бўйича аҳоли жон бошига 738,5 минг сўмлик хизматлар кўрсатилган, шу жумладан транспорт хизматлари – 243,8 минг сўм, савдо ва умумий овқатланиш хизмати – 128,8 минг сўм, коммунал

хизматлар 113,4 минг сўмни ташкил этди. Майиш хизмат кўрсатиш жами ҳажми 2007 йилга нисбатан 132,8 % ўсди.

Аҳолига кўрсатилаётган майиш хизматлар таркибида замонавий хизмат турлари устувор равишда ривожланмоқда. Майиш хизматларнинг ҳажмида енгил автомобилларни таъмирлаш ва техник созлигини аниқлаш хизмати улуши 14,1 %, мураккаб турдаги техник жихозларни таъмирлаш 10,6 %, яқка тартибдаги уй-жойларни қуриш, уларни ва кўп қаватли тураржойларни таъмирлаш хизматлари 12,0 %, аҳоли юкларини ташиш транспорт хизмати 12,4 %, сартарошхона хизматлари 5,6%ни ташкил этади.

Айни пайтда мазкур тармоқни ривожлантиришда мавжуд имкониятлардан ҳали тўлиқ фойдаланилмаётганлигини таъкидлаш лозим. Қишлоқ аҳолисига хизмат кўрсатиш тизими ҳозирги вақтда ўсиб бораётган талабларга жавоб бермаяпти. 2008 йилда жами хизматлар ҳажмининг 26,8 %и қишлоқ аҳолисига тўғри келди ёки ҳар бир қишлоқ аҳолисига кўрсатилган хизматлар ҳажми шаҳарликларга нисбатан 5,1 маротаба кам.

Бундан ташқари, янги хизмат турлари, жумладан, тадбиркорликни ривожлантириш учун қулай муҳит яратишда зарур бўлган молиявий, лизинг, консалтинг, юридик ва бошқа хизматлар етарли даражада ривожланмаяпти. Туристик хизмат кўрсатиш соҳасида беқиёс имкониятлар мавжуд бўлишига қарамай, ушбу соҳа секин ривожланмоқда.

Қишлоқ жойлардаги савдо корхоналарининг чакана савдо айланмаси умумий товар айланмасининг 171,9 %ини ташкил этди. Дехқон бозорлари томонидан ҳисобот даврида қишлоқ хўжалиги товарлари ва қорамол сотиш ҳажми 12,7 %га ошиб, 661955,9 млн.сўмга етди. Унинг товар айланмаси умумий ҳажмидаги улуши 35,8 %ни ташкил этди.

2009 йил январь-декабрида чакана товар айланмаси 1846956,8 млн.сўмни ташкил этди ва 2008 йилга нисбатан 115,3 % ўсди.

Савдо корхоналарининг чакана савдо айланмаси ҳажми 2009 йил январь-декабрида 865895,7 млн.сўмни ташкил этиб, 2008 йилга нисбатан 143,7 %га ошган.

Чакана товар айланмаси таркибида озиқ-овқат моллари улуши 2009 йил январь-декабрида 48,3%, ноозиқ-овқат моллари улуши 51,7 %ни ташкил этди.

Умумий овқатланиш соҳасининг товар айланмаси 54634,4 млн. сўмга етди ёки 2008 йил январь-декабрига нисбатан 20,1 %га ўсди.

2010 йилнинг 1 январь ҳолатига чакана савдодаги товар захиралари 10146,7 млн. сўмни ёки 9 савдо кунини ташкил этди.

Норасмий секторнинг буюм бозорлари ва ихтисослаштирилган бозорлар товар айланмаси 319105,2 млн. сўмни ташкил қилди ёки 2008 йил январь-декабрига нисбатан 108,9% ошган. Товар айланмасининг умумий ҳажмида унинг улуши 17,3% ташкил этди.

2010 йил январь-декабрида чакана савдо айланмаси таркиби

Кўрсаткичлар	Миллион сўм	2008 йил январь- декабрига нисбатан % ҳисобида	Яқунга нисбатан % ҳисобида
Чакана товар айланмаси	1846956,8	115,3	100
Шу жумладан:			
Савдо корхоналари	865895,7	143,7	46,9
Бозорлар	981061,1	124,5	53,1
Улардан:			
Буюм бозорлари ва ихтисослаштирилган бозорлар	319105,2	108,9	17,3
Дехқон ва озиқ-овқат бозорлари	661955,9	112,7	35,8

Ердан мустақил равишда ижара асосида фойдаланиш, сув ресурсларидан фойдаланишда ҳавзали бошқарув тизимига ўтиш ҳамда сувдан фойдаланувчилар уюшмаларини ташкил этиш ва ривожлантиришга устуворлик бериш, давлат эҳтиёжлари учун етиштириладиган маҳсулотлар ишлаб чиқаришда фермерларни уларга хизмат кўрсатувчи тижорат банклари орқали тўғридан-тўғри кредитлаш, лизинг асосида имтиёзли равишда техника воситалари билан таъминлаш, техникавий хизматлардан фойдаланишда улар қийматини 15% ҳамда хўжаликлараро суғориш тармоқларини сақлаш, қайта тиклаш ва ишлатиш харажатларининг давлат томонидан қопланиши, қишлоқ хўжалиги учун етказиб берилаётган саноат маҳсулотлари учун қўшилган қиймат солиғи тўлашнинг бекор этилиши ва шу каби тадбирлар фермерлик ҳаракатини ривожлантириш, фермерларни ресурслар ва хизматларга бўлган талабини тўлақонли қондиришга қаратилган бўлиб, улар ўз ижобий самарасини бермоқда.